

## BOEDAPEST, WENE EN SALZBURG met PASSIESPEL

16 – 28 Julie 2022

### NADERE BESONDERHEDE

**TOERPRYS:** R54 835 plus Lughawebelasting en Fooitjies van ongeveer R9 200 asook koste van reisversekering en visum. (Sien UITGESLUIT BY TOERPRYS).

#### INGESLUIT BY DIE TOERPRYS:

- Retoervliegkaartjie met Lufthansa: Johannesburg – Frankfurt – Boedapest  
München – Frankfurt – Johannesburg
- Vervoer per luukse bus
- Verblyf in goeie hotelle met twee etes per dag
- Aandetes op Donau in Boedapest en in Donau-toring in Wene
- Stadstoere van Boedapest en Wene en staptoer in Salzburg
- Besoek aan Szentendre
- Besoek Weense woude
- Musiekkonsert in Wene
- Besoek aan Steyr op pad van Wene na Salzburg
- Voldag-uitstappie in die Salzkammergut
- Besoek aan Berchtesgaden – Hitler se Arendsnes (indien die weer gunstig is)
- Alle ekskursies en toegangsgeld soos op toerprogram
- Ervare Afrikaanssprekende toerleier(s) vergesel groep
- Verblyf (twee nagte) en twee etes per dag in die omgewing van Oberammergau
- Passiespelpakket wat Kategorie 1-Passiespelkaartjies en Engelse handleiding insluit

#### UITGESLUIT BY DIE TOERPRYS

- Lughawebelasting/brandstofheffing Lufthansa ± R7 800
- Fooitjies vir gidse, busbestuurders en hotelpersoneel: R1 400
- Reisversekering, waarvoor u later volledige besonderhede sal kry
- Verkryging van paspoort
- Visumkoste: Schengenvisum ± R1 900
- Enkelkamerbybetaling in hotelle (Boedapest, Wene en Salzburg) ± R8 000
- Binnelandse aansluitingsvlugte na die O.R. Tambo-lughawe in Johannesburg
- Persoonlike uitgawes op die toer: bv. u eie eet- en drinkgoed, telefoonoproep, ens.

#### ENKELVERBLIF

Toerlede kan enkelverblyf by die hotelle kry, mits hulle bereid is om 'n bedrag by te betaal – sien vorige punt.

**BELANGRIK:** Indien u as enkeling reis, moet u bereid wees om in Oberammergau (twee nagte) met een van die ander enkellopende toerlede 'n hotel-/gastehuiskamer te deel indien 'n enkelkamer nie beskikbaar is nie. Die personeel by CvW-Toere sal uit die enkellopende toerlede die mees geskikte plasinge vir akkommodasie in Oberammergau probeer maak.

#### INSKRYWING

Vul asseblief 'n Inskrywingsvorm in, al het u dit reeds voorheen gedoen. Sodoende kan ons seker maak dat ons u mees onlangse besonderhede het en dat daar nie verwarring ontstaan nie.

'n Inskrywing is geldig wanneer ons u deposito **tesame** met die Inskrywings- en Vrywaringsvorm ontvang het. Die Inskrywingsvorm moet volledig voltooi word met u **volle name soos dit op u paspoort verskyn!**

Nadat u ingeskryf het, ontvang u Omsendbrief 1 met onder andere besonderhede in verband met klere wat u moet saamneem en dies meer. Daarna ontvang u nóg omsendbriewe met nuus en inligting. **Laat weet ons asseblief indien enige van u kontakliging verander.**

#### BEREKENING VAN TOERPRYS

'n Toerprys bestaan hoofsaaklik uit die koste van die vliegkaartjie plus die landreëlings en kan aangepas word indien omstandighede buite ons beheer dit noodsaak. Die vliegkaartjie se prys verander nie. Die prys van die lughawebelasting is aan die wisselkoers en brandstofprys gekoppel en word op die dag van uitreiking bepaal.

## DEPOSITO'S

Daar is verskillende deposito's ter sprake: Toerdeposito en Passiespeldeposito.

**Toerdeposito: R8 000 per persoon**

**Passiespeldeposito: R12 000 per persoon**

## FINALE BETALING

Die volle toerprys plus alle ander geld (fooitjies, versekering ens.) vir die toer moet vóór **16 Maart 2022** betaal word.

## WYSE VAN BETALING

- Vliegkaartjies en lughawebelasting kan per kredietkaart of direk aan CvW-Toere betaal word. U sal op die Vliegkaartjiebestelvorm wat u met omsendbrief 1 ontvang, u keuse van betaling kan invul.
- **Bankdeposito/EFT:** word deur inbetalings/elektroniese oorplasinge aan CvW-Toere gemaak.
- **Kontantinbetalings:** Alle geld wat in banknote inbetaal word, moet die ekstra kontantinbetalingskoste insluit. Vra asseblief u bank hoeveel dit beloop (ongeveer **1% van die inbetalingsbedrag** kan hiervoor begroot word).
- Ons aanvaar ongelukkig nie meer kontant by die kantoor nie. Betaal asb. kontant in CvW-Toere se Standard Bank-rekening in.

## BANKBESONDERHEDE:

**Christine van Wyk-Toere**

**Standard Bank Tjekrekening** (Lopende rekening / Current account)

Takkode: **051001**

Tjekrekeningnommer: **410 722 782**

**NB: Gebruik u VOORLETTERS EN VAN as verwysing met betalings** en nie die toer se naam of u noemnaam nie.

## KANSELLASIE

Indien u genoodsaak is om u toer te kanselleer, geld die volgende voorwaardes en terugbetalings:

### Terugbetaling van Passiespeldeposito

Omdat CvW-Toere die volle Passiespelpakkette aan Oberammergau oorbetaal, loop ons die risiko om die geld te verloor indien u u bespreekte plek op 'n toer kanselleer en dié plek nie deur iemand anders geneem word nie. Indien u genoodsaak is om te kanselleer kan ons slegs u Passiespeldeposito terugbetaal indien ons daarin slaag om u Passiespelpakket te herverkoop.

### Terugbetaling van toerdeposito

Ingeskrewe toerlede wat vóór **16 Februarie 2022** skriftelik kanselleer, kry **R7 500** per persoon van die toerdeposito terug. Toerlede wat **daarná, tot 16 Maart 2022** kanselleer, kry **R7 000** per persoon terug. **Ná 16 Maart** word **geen deposito's** terugbetaal nie.

Indien 'n toerlid genoodsaak is om vanweë siekte te kanselleer voordat die finale toerprys betaal is (dit wil sê vóór **16 Maart 2022**), word die volle deposito minus R500 per persoon by voorlegging van 'n doktersertifikaat terugbetaal.

**Toerdeposito's van toerlede wat kanselleer, word terugbetaal wanneer die toer se finansies afgesluit is.**

Sodra die nodige reisversekeringspolis wat vir kansellasiedekking voorsiening maak, uitgeneem is, kan u – indien u moet kanselleer – u geld vanaf die versekeringsmaatskappy terugeis, mits die rede vir kansellasië kragtens die polis aanvaarbaar is. Volledige besonderhede oor reisversekering word gestuur aan almal wat vir die toer inskryf.

Toerlede het die keuse om hul versekering deur ons kantoor uit te neem of dit privaat te doen en dan afskrifte van die dokumente as bewys aan ons te verskaf.

## VLIEGKAARTJIES EN EIE VLUGTE

Alle vliegkaartjies word deur **FERNWEH TRAVEL** uitgereik. Die toerprys sluit vliegkaartjies in, maar nie lughawebelasting en binnelandse aansluitingsvlugte na en van Johannesburg nie.

Indien u nie die groepvlug gebruik nie, kan u die prys van die groepvliegkaartjie van die toerprys aftrek.

Die bedrag ter sprake is: **R4 580**

## WEGBREKERS

Dit is moontlik om voor of ná afloop van die toer op u eie te reis (met ander woorde van die bestaande toerprogram weg te breek). U kan steeds die groepvlug gebruik, maar u moet u vlugte met Benita van Fernweh Travel bevestig. Die lugdiens hef 'n **wegbrekersfooi** van ongeveer **R500** indien u u groepvlug wil aanpas.

Kontak **Benita** by **Fernweh Travel (verkieslik per e-pos)** vir meer inligting en reëlings in verband met wegbreekvlugte.

### KONTAKBESONDERHEDE Benita Venter Fernweh Travel:

E-pos: [benita.venter1@gmail.com](mailto:benita.venter1@gmail.com)

Tel: 072 935 3679

## PASPOORTE (DRINGEND!)

Maak asseblief seker dat u **paspoort vir minstens 3 maande ná u terugkeerdatum uit Europa steeds geldig is**. Daar moet ook genoeg spasie – **minstens drie opmekaarvolgende skoon bladsye** – in u paspoort wees. Dit is vir visums en doeanestempels.

**LW:** Dit neem tyd om 'n nuwe paspoort uit te reik. Indien u paspoort nie reg is nie, kan dit veroorsaak dat u nie betyds u visum bekom nie.

### MINDERJARIGES WAT SAAM MET U REIS (Indien van toepassing):

**BAIE BELANGRIK:** Alle visumaansoeke vir minderjariges moet saam met 'n oorspronklike *unabridged*-geboortesertifikaat ingedien word. 'n *Unabridged birth certificate* verskil van die standaardgeboortesertifikate wat deur Suid-Afrika se Departement van Binnelandse Sake uitgereik word. Dit bevat onder andere die kind asook albei ouers se volle name en identiteitsnommers op één, amptelike dokument.

Kontak ons indien u beplan om minderjariges saam met u op reis te neem.

## GESONDHEID EN TOERFIKSHEID

Dit is vanselfsprekend dat iemand wat oorsee wil reis se fisieke en emosionele gesondheid van só 'n aard sal wees dat hy/sy redelik onafhanklik oor die weg kan kom.

Hierdie toer is veeleisend, aangesien die meeste van die stadstoere en besoekpunte op die toerprogram te voet aangedurf word. Toerlede wat nie onafhanklik oor die weg kan kom nie, moet 'n toermaat/familielid saamneem wat hulle kan help en na hulle kan omsien sodat hulle nie heeltyd van mede-toerlede afhanklik sal wees of die groep se belange op enige manier benadeel nie.

Basiese riglyne vir toerfiksheid is dat 'n mens onafhanklik in-en-uit 'n toerbus of boot moet kan klim, onafhanklik 'n stel van 15 trappe, insluitend roltrappe, kan klim en ongeveer 1 km op jou eie moet kan stap. 'n Mens moet deurentyd jou eie handbagasie kan hanteer en bereid wees om jou groot (inweeg)tas by jou hotelkamer te besorg indien daar nie bagasiediens beskikbaar is nie. U moet bereid wees om op eie koste 'n huurmotor te gebruik indien 'n besoekpunt tydens die toer vir u te ver is om te stap. Indien u nie aan hierdie riglyne voldoen nie MOET u iemand saamneem wat na u kan omsien.

## COVID-19

Dit blyk dat 'n bewys van inenting teen die Coronavirus ('n sogenaamde 'inentingspaspoort') voortaan noodsaaklik vir internasionale reis sal wees. Dit kan ook wees dat 'n negatiewe Covid-toets 48-uur voor vertrek vir sekere lande voldoende is. Daar is nog geen amptelike verklarings hieroor uitgereik nie, maar hou dit solank in gedagte. Ons sal u op hoogte van die verwickelinge en vereistes hou.